



3. september 2021

Inatsisartut suleriaasianni § 37 imm. 1 malillugu Naalakkersuisunut ukuningga apeqquaqateqarpunga.

Naalakkersuisunut apeqquaqaatit:

- 1. Namminiilivittoqassappat Kalaallit Nunaata nunap tassanilu imartatta illersornissaat qanoq Naalakkersuisut takorloorpaat?**
- 2. Naalakkersuisut USA-mut saaffiginnissimappat paasiniallugu qanoq akeqassanersoq USA-mit illersorneqarnissaq?**
- 3. Naalakkersuisut Islandimut saaffiginnissimappat paasiniallugu, "Islandimiut periusaat" sinerissamik sissuortoqarnermut tunngasoq qanoq akeqarnersoq?**
- 4. Naalakkersuisut Forsvarsakademiimi Center for Arktiske Sikkerhedsstudier-mi pisortaq isumaqatiginerpaat, taassuma nalilermagu, "islandimiut periusaat" pilersinneqassappat milliartinik arlalinnik akeqassasoq?**
 - a. Taamaangippat Naalakkersuisut saqqummiuseqquneqarput, namminneq qanoq akeqarnissaanik takorluuinerlutik**
 - b. Naalakkersuisut "Islandimiut periusaat" qanoq aningaasalersorniarpaa?**
- 5. Naalakkersuisut oqaluuserisamut allanik soqutiginarsinnaasunik paasissutissiisinnappat?**

(Inatsisartunut ilaasortaq Jens-Frederik Nielsen, Demokraatit)

Tunngavilersuut

Isertugaataangilaq, issittumi politikikkut pissaaneqarnermut annertoorsuarnik soqutiginnittoqarmat. Demokraatit Kalaallit Nunaata nunarsuup kitaanut attuumassuteqarnera namminersortuuneralu malillugu isumaqarput tamassuma tungaanut alaatsinaattuassasoq.

Taamaattumik pingaartuuvoq, namminiilivittoqassappat uagut nunatut pilersaaruteqarnissarput, qanoq iliorluta nunarput imartaalu illersussanerlugu. Naalakkersuisut nunatta sakkulersorfiunnginnissaa kissaatigaat Nunanullu Allanut, Inuussutissarsiornermut, Niuernermut Silaannaallu pissusaanut Naalakkersuisoq arlaleriarluni oqaaseqartarpoq siunissami kissaatigalugu USA Kalaallit Nunaannit illersuisuussasoq sinerissamik nakkutilliinermik tapertalerlugu.

Tassunga atatillugu soqutiginassaaq paasissallugu, arlaatigut tamanna Naalakkersuisut eqqarsaatigilluarsimaneraat imaluunniit oqaaseqaatit eqqoriaanerinnaasimanersut imaluunniit taamaattussaannartut aallaaveqarsimanersut.

Apeqquaqaatima ullut suliffiusut qulit iluanni akineqarnissaat kissaatigaara.